

清史列傳

冊一

周易

卷之三

清史列傳 卷六十七

儒林傳上二

勞史 桑調元 茅星來

勞史字麟書浙江餘姚人世爲農史幼而端凝不與羣兒伍未就塾輒從旁舍耳誦十三經及長躬耕養父母夜則披卷莊誦年十七反復朱子大學中庸序遂慨然立志爲眞儒舉動必依於禮繼讀朱子近思錄立起設香案北面稽首曰吾師在是矣嘗館上虞顧氏有藏書數萬卷三年卒讀自是研極性理常自刻責謂天之命我者若君之詔臣父之詔子一廢職卽膺嚴譴一墜家業卽窮無所歸可不慎哉其論學以爲下學之功始於不妄語不妄動極之至誠無歇手處接後學委曲盡誠雖傭工下隸皆引之嚮道曰盡爾職分務實做去終身不懈卽聖賢矣勿過自薄也聞者多化之里中貟販者近史居不敢貨僞物芻兒牧童或折棄矰繳毀機穿有鬪爭者就史質往往置酒求解晚年涵養益沖粹預知死期沐浴更衣移臥正寢無疾而逝年五十九時康熙五十二年也史之學精於易嘗謂易之爲

道細無不該遠無不屆故其所著述多本易理以推人物之性有餘山遺書十卷
門人桑調元汪鑑編次付梓鑑字津夫亦餘姚人父死於雲南鑑護喪歸至漢川
遇大風舟且覆抱棺大哭誓以身殉忽風回閣沙渚乃免衆呼爲孝子爲人尙氣
節史戒之曰英氣客氣也其學以鎔之自是研心朱子之學粹然儒者矣史之歿
也鑑實左右焉 桑調元字伊佐浙江錢塘人父天顯性至孝親病膈合羊脂和
粥以進親死抱鐺而哭人爲繪抱鐺圖調元少有異才下筆千言屈其儕輩年十
五受業於史得聞性理之學性耿介不妄交人尤嚴取與之辨雍正四年舉順天
鄉試十一年會試後遴選舉人之明習性理者得八人調元與焉特旨賜進士授
工部主事丁父憂廬墓三年服闋補官釐正規約吏餽以羨金卻不受旋引疾歸
嘗主九江濂溪書院構須友堂祠史以著淵源有自又闢餘山書屋於東皋別業
友教四方之士一以程朱爲法晚主灤源書院益暢師說著有論語說二卷所言
皆闡集注未盡之義頗爲細密又躬行實踐錄十五卷言敬言仁一宗程朱持論
亦極醇正其詩文縱橫排奡自成一家有弢甫集八十四卷乾隆三十六年卒年
七十七同時爲程朱之學有歸安茅星來 茅星來字豈宿諸生少銳志爲學研

究經史欲以著述自見初讀書圓義精舍覽近思錄有得於科舉奪志一語遂棄帖括潛心是書三十餘年以葉采集解粗淺舛錯乃參校同異薈萃衆說於治道治法逐一疏證名物訓詁亦必析其本末著近思錄集注十四卷其後序云自宋史分道學儒林爲二而言程朱之學者但求之身心性命間不復以通經學古爲事竊嘗論之馬鄭賈孔之說經譬則百貨之所聚也程朱諸先生之說經譬則操權度以平百貨之輕重長短也微權度則貨之輕重長短不見而非百貨所聚則雖有權度無所用之故欲求程朱之學者必自馬鄭諸傳疏始愚於是編備著漢唐諸家之說以見程朱諸先生之有本俾空疏者毋得而藉口焉其持論光明洞達足觀心術之正星來工古文辭嘗曰爲詩文之用而讀書不雜則陋必去其有所爲之意而後可與語於古遊京師桐城方苞溧陽任蘭枝見其稿譽之不容口性迂執復口吃故無敢薦達之者又嘗游滋陽土人不知食鱠羸而署中人食之星來愀然爲述明道爲上元主簿教民勿持竿黏飛鳥爲戒乾隆十三年卒年七十一又著有鈍叟文集

邵廷采

邵廷采字念魯浙江餘姚人諸生曾可孫幼時曾可偶舉宋儒語教之興曰其人安往耶願師事之曾可以爲有志卽送之姚江書院時沈國模年八十爲諸生設講廷采立聽久之執卷詣曰孩提不學不慮堯舜不思不勉同乎國模歎曰孺子知良知矣能敬以恕吾何加焉自是從韓孔當受業又問學於黃宗羲初讀傳習錄無所得旣讀劉宗周人譜曰吾知王氏學所始事矣蠡縣李塨貽書問明儒異同廷采答曰致良知者主誠意陽明而後願學蕺山又嘗與人論學廷采曰天泉四言陽明原本無極之說儒也龍溪浸淫無生之旨釋也孝感熊賜履以闢王學爲己任廷采曰是不足辨顧在力行耳廷采雖講學好求經世大略論改學校曰重經術廢時文如試頌說可也用徵辟嚴保舉罰其不稱可也立明師養歲貢如經義治事分課可也行科目復對策如賢良方正三試可也又曰學校兼騎射然後用之可以當大事今西北之人不知耕東南之人不知戰皆危事也生平於林算占候陣圖擊刺無不學嘗與將軍施琅縱談沿海要害琅奇之旣游西北走潼關講學於黃岡之姚江書院復入京師商邱宋犖鄞萬經欲招入一統志館以老辭晚歲思託著述以自見以爲陽明扶世翼教作王子傳蕺山功主慎獨忠清節

義作劉子傳王學盛行而艮畿躋雜羅楊詭亂務使合乎規矩作王門弟子傳金
鉉祁彪佳張兆鼇黃宗羲等確守師說作劉門弟子傳嘗從宗羲問逸事於明末
諸臣尤能該其本末所作宋明遺民所知傳倪文正施忠愍諸傳凡數十篇欲勒
成一書未竟有東南紀事十二卷西南紀事十二卷康熙五十年卒年六十四弟
子刻其文爲思復堂集十卷又姚江書院志略四卷

沈佳向璿

沈佳字昭嗣浙江仁和人康熙二十七年進士初知湖廣監利縣調安化卒於官
佳兒時卽有志伊洛之學及長研窮性理嘗與柘城竇克勤鞏姚爾中及錢塘王
廷燦秀水范景俱及睢州湯斌之門斌集中語錄佳諸人所手述也然佳之學雖
出於斌斌參酌朱陸之間佳則一宗朱子以餘姚黃宗羲明儒學案於姚江末流
頗爲回護乃著明儒言行錄十卷續錄二卷以補救其偏其書仿朱子名臣言行
錄例大旨以薛瑄爲宗於陳獻章則頗致不滿雖收王守仁於正錄而守仁弟子
刪汰甚嚴王畿王艮咸不預焉同里應撫謙稱其書去取至慎有所不足仍載先
儒論定之言以爲斷甚不得已始出己說以微示其旨鄞萬斯大宗義弟子也平

生篤守師說然序是書亦但微以過嚴爲說不能攻擊其失蓋心許之云佳好學深思考訂博洽嘗貽書撫謙論易四德及禮禘祫義所居名學士園自少壯至老未嘗輟書卷他著有禮樂全書四十卷易大象玩易解春秋學大全粹語明代人物考樂府中聲省譽錄復齋遺集 向璿字荆山浙江山陰人五歲母口授四子書卽了大義及居母喪哀毀逾禮事父以孝聞聞郡城陽明後裔王行九講良知之學卽糾同人爲輔仁會沈酣其說者六七年人目爲癡因著癡人傳以自況後得薛瑄高攀龍書反覆玩味知王學之非自是確守程朱嘗言爲學大綱不外居敬窮理力行三者而以居敬爲本窮理而不以敬知必不精力行而不以敬行必不篤又言人一刻不畏天便是罪過一事不反躬便涉怨尤故其平居雖小過自責甚嚴日之所爲夜必告天家貧授徒自給或終日不舉火處之怡然又善啟發人亦未嘗强聒也雍正九年卒年五十著有四書記疑志學後錄

徐世沐黃商衡 華希閔 張雲章 王步青

徐世沐字爾瀚江蘇江陰人諸生少孤力學自立見太極西銘諸書發憤志道年二十餘往見太倉陸世儀讀所著酬答理要深信之世儀謂衆人之學不汎濫文

詞卽沿習二氏惟世沐讀書窮理以求自得又謂世沐好推伊川不畏拘檢所向甚正因申言理一分殊之旨以示世沐世沐又與無錫高世泰諸人往來論學以資其益其爲學篤信朱子切已反求辨別異同務歸於下學實踐俾人無惑歧途而後已驚厓李容南遊與世沐論學容曰子學篤而行未廣世沐曰先生行高而學不醇其不苟同如此後得容四書反身錄讀之曰容學從陸王入而出入於程朱四子余學從程朱入而準則於周宋八賢雖沐染南風剛峻良有不逮而古人所云醇正則當仁不欲多讓因著四書惜陰錄二十一卷大旨以爲聖賢之學隨知隨行若知而不行雖盡讀經史徒敝精神其光陰可惜尤深痛舉業之驅人入鄙欲學者實從事於聖賢之道而勿務空知一章之中三致意焉晚歲以子恪選拔攜入都仇兆鼈見而驚歎言於衆安溪李光地遂與訂交平湖陸隴其嘉其篤學摘錄中精要語置行篋中爲之跋康熙五十六年疾革遺命勿作佛事息心靜氣以卒年八十八他著有易書詩三禮春秋惜陰錄共八十四卷又周易存義錄十二卷周易惜陰詩集三卷性理吟二卷世沐之後有長洲黃商衡無錫華希閔嘉定張雲章金壇王步青黃商衡原名師憲字景淑父農以孝子旌商衡少孤

奉母教刻苦於學夜寢刻香繫鐵錘下承銅盤香盡錘墮擊盤聲鏗然卽驚起讀達旦年四十餘補諸生不復進取日讀儒先書尤好蕺山人極圖說推衍其義貫以論語大學中庸及橫渠考亭緒言輯爲一書題曰困學錄自命又次學人乾隆六年卒年六十五 華希閔字豫原康熙五十九年舉人乾隆元年舉博學鴻詞不赴試十六年年八十高宗南巡迎駕惠山賜知縣尋卒希閔嗜學能古文以力扶正學爲己任生平慷慨尙氣節巡撫張伯行與總督噶禮互揭主其獄者爲張鵬翮欲庇噶禮罪伯行希閔上書斥之幾罹禍後伯行劾布政使牟欽元鵬翮復劾伯行狂妄革職逮鎮江希閔冒死入獄與伯行相勞苦鵬翮舊視學江左有聲吳人祠之江陰至是鵬翮坐伯行挾詐欺公議斬吳人聞之涕泣希閔因言伯行擢折狀遂共燬鵬翮祠以此名聞江淮間家素裕於義舉無不爲撫幼弟成立卽以父遺金畀之布政使鄂爾泰設春風亭招致賢俊希閔與沈德潛同以耆德見重著有大學約言中庸贊語論孟講義易書詩禮春秋集語性理注釋延綠閣集張雲章字漢瞻太學生嘗從陸隴其遊講學論道有悠然自得之趣遊京師客徐乾學家爲校勘宋元經解張伯行撫吳延纂禮經成服制四卷性靜默不馳逐

聲氣惟以名節相砥礪隴其爲當路所排雲章上書乾學以救之及伯行與噶禮互劾奏讞久未決復上書李光地責其別白是非爲桐城方苞所推重後與修尙書彙纂書成議敍知縣不謁選伯行總督倉場留主潞河書院踰年辭歸雍正初舉孝廉方正以老辭四年卒年七十九所爲文宗南宋服膺朱子暨南軒東萊止齋同甫諸家著有樸邨集二十卷王步青字漢階雍正元年進士改翰林院庶吉士散館授檢討以告歸步青長身玉立少以文名然覃心正學張伯行撫吳集十五郡知名士講學紫陽書院課以語錄步青三試皆第一伯行稱其能窺道之本原契聖賢之旨趣嘗與桂林陳宏謀書十餘通皆以道義相勖興正學整吏治勵風俗期以一代名臣宏謀謂步青以濂洛關閩爲宗傳以日用倫常爲實際躬行心得不徒飾以空言其教學者一遵白鹿洞遺規晚尤勤學顏其齋曰無逸所謂我朝用經義取士士子當因文見道著朱子四書本義滙參四十五卷又著有己山文集十卷別集四卷乾隆十六年卒年八十

焦袁熹楊履基

焦袁熹字廣期江蘇金山人康熙三十五年舉人袁熹穿穴經傳於諸經注疏皆

有筆記其說易專主義理說禮推言禮意而於春秋尤邃著春秋闕如編入卷自穀梁發常事不書之例孫復衍有貶無褒之文後代承流轉相摹倣務以刻酷爲經義遂使游夏贊之而不能者申韓爲之而有餘袁熹獨酌情理之平立褒貶之準謹持大義刊削煩苛如謂隱公盟蔑繼好息民猶愈於相虞相詐至七年伐邾事由後起不容逆料而加貶辭謂會潛之戎本雜處中國修好亦衰世之常事褒貶俱無可加謂無駭之書名若後世帝室之胄不繫以姓非貶而去之謂書齊侯弟年見齊之重我使其親貴非譏過寵其弟謂書螟爲蟲傷稼卽當留意補助不以此一事便爲惡如此之類皆一洗曲說至於武氏子求賻乃魯不共命天王詰責豈敢反譏天王家父求車乃天子責貢賦有闕經婉其文曰求車不應舍其下責上尤大義凜然非陋儒所及又著此木軒四書說九卷疏理簡明引據典確閒與章句集注小有出入要能釐然有當於人心性至孝事親著書不求聞達鄉薦後自以非用世材遂不會試五十二年李光地王頊齡俱以實學通經薦以親老固辭後銓授山陽敎諭仍乞終養不赴生平心師陸隴其不名不字而不走其門王鴻緒纂輯明史招袁熹預其事月餘以持論不合辭去嘗自作經生歌云章句

微細必無豪賢可哀哉說經鐸鐸乃畢吾之餘生其志不近名學問篤實如此雍正十三年卒年七十六又著有經說彙編六卷讀四書注疏八卷太極圖說就正編一卷太玄經解一卷潛虛解一卷九歌解二卷紀年略五卷經世輯論五卷雜著八卷談佛乘贊語五卷尙志錄一卷詩文集二十餘卷 楊履基初名開基字履德亦金山人優貢生生而穎敏五歲授漢魏六朝詩卽能成誦高宗南巡召試詩賦取入二等有內府文綺之賜生平博涉羣書從平湖陸奎勳遊私淑陸隴其以隴其松陽講義爲晚年手定之書張伯行刪本殊失初意因重編其書附以己意爲二卷事親孝居喪一遵家禮儀節嘗與友人論喪禮謂記云居喪未葬讀喪禮旣葬讀祭禮此爲平日未讀禮者言也張子言居喪他書不可觀蓋謂非聖之書讀聖賢之書未必越於禮外聖賢之學豈以居喪而遂忘之耶著有三禮臆說觀禮編春秋四傳存疑律呂指掌圖鐵齋偶筆詩文集乾隆四十年卒年六十有三

張自超 劉齊 劉捷 姜兆錫

張自超字彝歎江蘇高淳人康熙四十二年進士少孤課耕奉母博通經史以躬

行實踐爲主視人世所歆羨泊如也爲諸生負重名迨通籍年已五十長洲韓菼欲其就館職以母老辭又以己非用世材不謁選遂歸無子母病篤爲買妾命入側室泣曰兒方寸亂矣雖入室不能歡合成子姓天果不絕張氏兒何患無子後終母喪數年妾卒不孕人服其知命不惑治經尤長春秋著春秋宗朱辨義十二卷大旨本朱子據事直書之旨不爲隱深阻晦之說惟就經文前後參觀以求其義篇首總論二十條頗得比事屬辭之旨其中如單伯逆王姬則從王氏之說以爲魯之大夫於秦獲晉侯辨所以不書名之故於宋師敗績辨所以不書公之故於司馬華孫來盟辨胡傳義不係乎名之說於盟宋罪趙武之致弱於楚公子比公子棄疾弑立書法見春秋微顯之義於齊殺高厚謂非說晉而於衛人立晉一條尤得春秋深意雖以宗朱爲名而博參經傳務求心得實非南宋以來穿鑿附會之說後桐城方苞作春秋通論多取材是書所爲詩古文皆從經學中出而未嘗爭名於時歸後授經講學文行日著浙撫徐元夢聘主萬松書院一以程朱遺法教人董邦達汪由敦皆出其門性明決所不爲衆莫能奪所欲爲雖困不悔高淳故湖壩以圩障水於外而耕其中歲大潦隄潰自超獨毀其船以板築隄完

大有年衆歸其值不受後歲連祲道殣相藉自超與知縣籌賑先賤價賣其田捐二百金爲富室倡時有孔某餉以金作詩卻之曰衆飢天所災獨飽忌鬼神孔得詩卽出粟助賑晚歲家日落然不受饋遺鄉人有不善常畏其知五十六年崑山徐乾學以經學薦召入都行至茌平無疾而卒年六十餘方苞嘗以自超與大興王源無錫劉齊上元劉捷並稱四君子源附顏元傳 刘齊字言潔拔貢生性耿介初入太學徐乾學方收召後進齊閉門修業與友三數人誠勿往應順天試有欲援進者作閨女詞謝之教習期滿以不謁吏部侍郎某授州佐或勸納粟爲教官齊曰教官雖微當爲諸生明義利之辨奈何先以納粟進遂歸年四十七卒方苞初薄視宋儒書及交齊勸以講索乃深嗜焉齊卒後苞題其墓曰狷者 刘捷字月三康熙五十年舉人年羹堯巡撫四川請與偕議加賦力爭而止遂以他故行曰其心神外我矣能守吾言以期月乎張鵬翮督學江南招入使院有故人夜詣出千金請事峻拒之卒年六十九方苞與四人交最久而捷兄輝祖及青陽徐念祖宿松朱書亦與方苞善苞嘗言志趨之近者則自超齊捷念祖術業之近者則源書輝祖云 姜兆錫字上均江蘇丹陽人康熙二十九年舉人乾隆元年以

大學士鄂爾泰薦充三禮館纂修官兆錫采輯羣書折衷衆說寅入申出以勤博稱時方苞長於三禮與兆錫集議多不合苞據書望於山川釋四望爲山川之祭兆錫謂大司樂四望與山川異樂典瑞四望與山川異玉當從鄭說苞謂春人序官奄二人恐不給用意周皇后夫人節儉躬率嬪御任春揄之事兆錫謂司厲女子入於春橐係罪人不可限以數寧寡母多本職奄與女奚止九人者約舉之詞耳王后以陰禮婦職統嬪御安得自任春揄諸如此例日有數端然兆錫論出苞亦不能難也兆錫自壯年鑽研三禮後益殫精著述有書經蔡傳參義六卷周禮輯義十二卷儀禮經傳內編二十三卷外編五卷禮記章義十卷春秋公穀彙義十二卷胡傳參義十二卷孝經本義一卷爾雅參義六卷自題曰九經補注謂補朱子所未註也其禮記章義謂漢儒掇拾成章往往誤斷誤連當分章以明義其所指謬多有考證較陳澔集說爲密其公穀彙義謂二傳主於發義與左傳主於記事者不同然有混其文以害義者有泥其文以害義者並有竄其文而事與義俱害者惟正終以正始貴道不貴惠之屬固卓乎道義之權衡聖哲之軌範也因彙編二傳異同之處別白其是非而左氏發例釋經之文附見焉於三家褒貶之

例無所偏主足資參考又有周易本義述蘊四卷周易蘊義圖考二卷詩蘊四卷
大戴禮刪翼四卷春秋事義慎考十四卷家語正義十卷孔叢子正義五卷所居
白鶴溪之藤村姜氏族將萬人兆錫以孝友忠信爲祠正十年卒年八十高宗南
巡孫奭以其所著書進賜文綺

陳遷鶴子萬策

陳遷鶴字聲士福建龍巖人康熙二十四年進士改翰林院庶吉士散館授編修
歷官至左春坊左庶子入直南書房四十七年年七十致仕歸又六年卒遷鶴遂
於經學不墨守前人成說嘗爲太極無極說曰周子曰無極而太極邵子曰道爲
太極心爲無極異端者流竊此爲空虛之說至理晦焉愚謂天地之道動靜而已
舍動靜無所爲天地者人心之妙亦動靜而已舍動靜無所爲人心者必曰有物
立乎動靜之先思之不得其解遂以冥漠無爲者當之是爲佛老張其幟也夫天
地之道純粹精也所謂太極以其純粹者而動萬物生焉得名之曰陽以其純粹
者而靜萬物成焉得名之曰陰太極卽在陰陽中也人心具仁義禮智之全德太
極也靜而歛精固神陰也動而舉事宜謀陽也太極卽在動靜中也是故陰陽者